

10. Oktober 2017

UKA 2017/115

Illoqarfinni nunat immikkoortuini qitiusumik napparsimaveqarfiusuni toqusimasut timaannik ikuallaaveqalersinnaaneraniq periarfissanik kiisalu aningaasaqarnikkut pitsaaqutinik pitsaanngequtinillu misissuinissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut. Taamattaq Naalakkersuisunit misissuiffigineqassaaq innuttaasut toqusimasut timaannik ikuallaasalersinnaanermut periarfissaqalernissaq tapersorsorneqarnerseq. Misissuinerup inernera UKA18 aallartitsinnagu saqqummiunneqassaaq.

(Inatsisartunut ilaasortaq Kelly Berthelsen, Inuit Ataqtigiit)

Inatsisartunut ilaasortap Kelly Berthelsen Inuit Ataqtigiit aalajangiiffigisassatut siunnersuutaanut soqutiginaratumut Siumumiik imaattumik oqaaseqassuugut.

Inatsisartunut ilaasortap Kelly Berthelsen-ip Inuit Ataqtigiit oqallisissiaa nipangiutiinnartariaqanngittutut Siumumiik isumaqarfigivarput.

Ukiut arlaqanngittut matuma siorna oqallisaaleraluarmat toqusortatsinnik ikuallaasalersinnaaneq oqaluuserineqartariaqanngittorluunniit ilaatingut misiginarluni sukkasuumik nipangiunneqarnikuuvoq.

Ullumikkulli naliginnaaleraluttuinnarnikuuvoq ukiorpassuarni nunatsinniinnikut kalaaleqatigulluunniit DK-mut nunaniluunniit allani nunaqalersimasut toqugunik ikuallanneqareerminni nunatsinni pinngortitami nuannarisaminnut arsakumi ilaasa nakkalataartinneqarnissaannik kissaateqartatut. Ilaallu iliveqarfimmut ilineqarnissaannik.

Oqaluuserisassanngortitsisup piffinni qitiusumik napparsimaveqarfisuni toqusimasut timaannik ikuallaaveqalersinnaaneq periarfissaqarnerseq misissorneqassasoq siunnersuutigivaa.

Tungavilersuutaasut Siumumiik ajorinngilagut. Soorlumi oqaatigigipput naliginnaalariartortoq inuiaqatitta nunatsinni ilisaarusuttut toqoreerminni kisaataat malillugu ikuallagaareerlutik nunatsinni ilisaarusuttarnerat.

Nunatsinnili ikuallagaasalersinnaanermik oqallinneq paqumigineqarparsittoq piumaneqarnerseq aammalu nunat immikkoortuini qitiusumik napparsimaveqarfiusuni ikuallaaveqalissagaluarpat qanoq naleqarsinnaanersoq naalakkersuisut misissuissasut isumaqatigaarput.

Nunap immikkoortuini qitiusumik napparsimaveqarfiusuni toqusoqartillugu assartuiniarnermut ajornartorsiortoqartarnera ilisimalluarparput. Tamanna aamma aningaasatigut imaannaaneq ajortoq ilisimalluarparput pingaartumik ukiuunerani.

Siunnersuuteqartup allanneratuut uagutaaq Siumumiik ilimagilluinnarparput inuiaat allat assigalugit timuip ikuallanneqarsinnaaneraniq periarfissaqartuuppat atuisinnaasoqartoq.

Taamatut oqaaseqarluta kingusinnerusukkut nalilersuutaajumaartussanik misissuisoqarnissaa isumaqatigalugu aappaagu ukiakkut saqqummiussisoqarnissaa taperserparput.

Jess Svane

Siumut